

左文襄公年譜

左文襄公年譜卷五

同治八年己巳公五十八歲

正月郭寶昌至韓城督所部逐宜洛回回踰山走延長合前
掠延安延川回絡繹道甘泉入山劉端冕與魏光燾迭出勞
山牛武川要擊回眾破散遺棄糧械山積自是東北回氛略
定其西南竄出者復圖越秦州鳳縣以窺棧道戊子李輝武
自寶雞率所部馳赴大破之斬馘千人是月戶部覆奏猶以
陝甘常年軍餉與見在用兵餉需歧混爲言公迺請於陝甘
軍餉外別立西征餉名條具楚軍人數餉需以對按原奏云楚軍馬步
約共七十營每月約共需銀二十一萬餘兩每年約共需實
銀二百五十餘萬兩楚軍營制步隊每營連長夫共六百八

十八人馬隊每營連長夫共五百八十八人七十營內步隊
五十五營馬隊十五營合共四萬五千七百餘人又文武隨
員差弁夫役及遠近各局隨時添派人數無定共約五萬餘
人馬約五千匹每人日食米一升每日需米五百石每月即
需米一萬五千石陝省市價大米及各省采買大米每百斤
長跌牽算約需銀四兩上下麥麪粟米每百斤長跌牽算約
需銀三兩則并食用亦且不敷養兵之難至於如此前年曾奉
糧三兩則并食用亦且不敷養兵之難至於如此前年曾奉
於從事經臣體察情形糧價正雜各殊長跌無定若將勇丁
口糧一律加增富其平減徒增浪費當其昂貴仍照舊章
一議加增即為定制後來不繼裁減為難故餉銀仍照舊章
而於各軍每領官糧百斤止扣價銀三兩其餘不敷之數均
準由臣作正開銷以見在糧價尚平計之除運腳外每百斤
約不敷銀一兩及七八錢不等每月合算即不敷銀一萬五
千兩有奇至馬乾一項原定每馬一匹月支馬乾銀三兩按
陝省見在市價每馬日食蘇三斤料三斤草十二斤計之月
已需銀五兩有奇若追賊兼程崎嶇險遠尚須酌加餼養則
不敷甚鉅畜馬之難又如此臣故於各營所領官發秣料柴
草等項亦皆格外從減扣價每月計不敷銀萬餘兩凡此變

通辦法明知爲例不應銷之款然地方情形不同不得不通融挹注以收飽騰之效總計米價馬乾兩項每月約需銀二萬餘兩每年約需實銀二十餘萬兩一采買製造各營所需軍裝軍火除陝軍甘軍經撫臣奏明由陝局供支外計臣部七十營合之劉松山郭寶昌李輝武等客軍尙不止百二十營所需軍火軍裝爲數甚鉅而洋礮洋槍洋藥洋火各項則陝軍甘軍概由臣局供支此項軍火由上海采辦而來價值昂貴其他軍裝所用如銅鉛鋼鐵以及檣簾麻紙油漆竹木等項陝省一無土產無非購自遠方至於棚帳旂幟號衣例應半年一換前均由鄂臺製造轉運西安臣覺其繁重多費至議停上就省局製造工料物價相較實尙不如遠省之費省工良見又招募浙江工匠備機器來陝製造洋槍銅冒開花子等件以省上海購運之費而目前所費又復不資專就棚張號衣兩項有定之數核算每年即不下十餘萬兩其餘軍裝軍火需用尙繁無成數可以預計每年又需銀十餘萬兩二共實需銀三十餘萬兩一轉運陝省水路險遠勞費殊甚水路溯江漢溯黃河盡係逆流推挽陸路則夫運馱載較斷崎嶇艱難萬狀以目前主客各軍所駐之地計之除水程不計外夫運以五十里爲一站馱運以六十里爲一站陸程已十餘站至二十餘站不等所運之項以糧食爲大宗本省

兵燹之後產糧無多又須少畱民食以故各軍采買均係購自四川湖北河南山西等省計程總在千里之外合楚陝各軍及駐陝甘軍勇夫共七八萬餘人每日人食一升日需米七八百石水陸遠近牽算每石約需運腳銀四五兩卽月需銀十萬兩有奇其軍餉軍火軍裝等項均由上海水運鄂臺由鄂水運紫荊關龍駒寨等處然後陸運西安再由西安分途解赴前敵各軍爲數繁鉅多少亦難預定大約每月總需銀二萬餘兩二共月需銀十二三萬兩通計每年運腳需銀一百五十餘萬兩以上薪糧及變通糧價專就臣所部楚軍而言每年共需實銀二百八十餘萬兩其采買製造轉運兩項則楚陝各軍及駐陝甘軍并劉松山郭寶昌李輝武等客軍均取給於此自應由臣統籌分給計每年又共需銀一百八十餘萬兩統計西征實餉每年共需銀四百六十餘萬兩其陝甘各軍餉項及賑撫難民安插降眾開墾屯田等經費均不奏入戶部議歲增撥釐金三百萬兩公請

敕翰林院侍講學士袁保恆總西征糧臺駐陝西

上從之而仍令公總司甘軍餉事保恆前准北督師袁公甲三之

子也二月回以屢敗乏食戊申糾眾三四萬踞正甯南北兩原圖犯邠州三水併力以擾秦州黃鼎遣總兵徐占彪率二千入扼牛家堡自率全軍踵其後己酉回前隊至牛家堡遇伏驚退其夜黃鼎渡涇進軍上世店回騎數千驟至官軍整隊進寇反走追至白吉原回酋余彥祿馬正和等擁大眾分十數路前撲方分隊迎拒寇已四合迺爲方陳而前槍礮俱發寇傷亡相積漸引卻副將劉治均馳入斬其酋寇失勢潰走雷正綰張岳齡分道遮擊皆有斬獲餘眾遁宮河王子公進乾州議大舉進攻而湘軍告變初劉松山自永甯渡河設糧局永甯軍渡既由綏德前進復分軍畱綏德以次遞運達

靖邊軍士更番往返散布數百里間會匪闖入其中相煽爲變乙卯遽劫各軍入襲州城松山方屯靖邊安撫降眾已未聞變疾由瓦窰堡折南至清澗遣部將曹義勝先入綏德城中軍聞統將至清澗則大喜乘夜殺游匪百餘人軍士被脅者亦羣起縛叛卒馳送清澗其事遂定同時高連陞軍親兵丁玉龍亦以會匪陰爲回內應事覺跳走連陞捕之急壬戌糾營勇突入楊店營戕連陞脅各營盡變屯同官將桂錫楨急入城守次日叛卒至攻城不下折還桂錫楨出城會周紹濂軍追擊殺數百人先後反正者二千餘人其夜回果至山河鎮劉倬雲令軍士佯爲叛卒招之大殲其眾未幾各軍悉

捕反者至公磔之以祭連陞

書讀卷十是年與庫仁會書云丁郎兩逆臨刑亦云罪該萬死

弟作祭文畢時已半夜正哀吟間忽一雀飛入幕中旋轉不去侍卒送之幕外旋又飛入以味銜侍卒之手甚笨此非果臣靈爽式憑耶此案磔誅者五斬梟七十二各營擒斬者又以千計亦可慰果臣及諸忠之靈惟殺犬鼠萬千烏能償吾果臣之命耶一愾而改編其營分隸魏光燾李輝武當綏德倉卒軍

變將軍金順暨山西巡撫鄭敦謹飛章入告已而高軍相繼

變中外震駭御史宋邦憲奏言南軍不復可用當遣散就地召募曾公國藩上疏力言劉松山可恃比

詔下詢公事已悉定董志原回自大挫後益兇懼謀出言將徙老弱金積堡於是公飭各軍儲糧料規賊動毋待報卽銳進以追而各畱軍三之一以防鈔襲庚申回大集蕭金鎮議併十

八營爲四大營以其半護累重先行崔偉馬正和等率悍黨萬餘伏董志原斷後而出游騎由泰昌政平等鎮分擾涇河兩岸以牽官軍於是黃鼎率所部會雷正綰長武馬德順李耀南各率馬步分駐靈臺甲子日向驛馬關三叉河北行其日雷正綰黃鼎自長武渡涇期馬德順李耀南會師泰昌偵悍黨尙伏董志原崔偉等酋屯三不通拒險迺分軍四路超三不通而遣楊世俊陳義以二千五百人從間道取蕭金鎮以達鎮原乙丑大軍進三不通回憑溝拒戰礮石雨集馬隊不得前黃鼎揮步軍從左右踰溝出其後寇驚亂官軍悉銳進寇大披靡原上回爭出接戰爲敗寇所牽相率狂奔乘勝

遂下董志原及焦村石社蕭金鎮各回堡賊屍填塞山原餘
寇嚮西峯鎮北走明日軍自董志原進追偵同一由驛馬關
走環縣一由蒲河川走三叉河時楊世俊等已由荔家堡前
復鎮原城於是雷正綰李耀南出鎮原前進三叉河黃鼎馬
德順兩軍趨環縣其日度驛馬關及寇黨家腰嶮前阻深溝
回大隊相擠官軍自後蹙之墮坑塹死者無算追五十餘里
回眾奔散丁卯復慶陽府城次日追至環縣寇走紅德城其
日雷正綰李耀南及寇三叉河沿途斬馘尤眾追至洪河川
偵寇已遠迺還拔出難民萬餘人回死者至三萬慶涇悉定
公上先後戰狀且奏曰竊維董志原地居秦隴要膺本唐之

涇原宋之環慶故地。昔時設立重鎮。以精兵宿將駐之。藉以控制遐荒。撫綏雜虜。形勢之重。自昔已然。陝回竊踞以來。遠近城邑堡塞。慘遭殺掠。民靡孑遺。平慶涇固之間。千里荒蕪。彌望白骨黃茅。炊煙斷絕。被禍之慘。實爲天下所無。此次乘其竄動。急追猛剿。積年螳穴。搜蕩一空。賊之精騎悍黨。銷亡殆半。機局本有可乘。惟師行所至。井邑俱荒。水涸草枯。賊因此而多所喪亡。官軍亦因此而艱於追逐。又其時適值內變紛乘。北路官軍。因內顧不遑。未克橫衝側擊。共赴師期。一收聚殲之效。是則臣等所耿耿不能自釋者也。見詔賊由環縣固原兩路竄至。下馬關。復由下馬關分竄蕭河城。預望城。半

角城金積堡一帶賊情渙散不但陝回與甘回因剽掠而肇
衅端卽陝回向分東彌西彌者亦因喪敗而懷怨恨陝甘回
患庶有止息之期此時所最急者宜乘時耕墾擇要興屯以
活遺黎而弭飢寒之迫以儲軍食而消譁變之萌庶內政旣
修軍民漸有固志迺可徐圖進取斷不宜苟且目前旦夕之
效求速反遲又蹈從前覆轍也其目前軍事如駐軍董志原
扼秦隴兩省關鍵駐軍秦州通蘭州一綫餉道駐軍正甯甯
州之間爲進慶陽之謀駐軍涇州爲通平固之漸皆主固秦
以規隴蓋自東徂西者形勢之自然由近及遠者行軍之次
第旣不敢濡滯而坐失事機亦不敢造次而貽譏壯往一切

規畫皆於無可設法中竭蹶圖之事同朔始艱阻萬狀臣等
惟有殫誠盡瘁以求下紓民難上慰

慈懷其時慶涇各屬人民散亡略盡公迺分軍進駐選吏士能作
苦者官其地招輯流亡計口授食督丁壯及時耕種給以籽
糧農器險要爲官屯領兵官主之堡塞爲民屯府州縣主之
因地所宜播種粟糜蕎麥諸種以耕牛不能多得示以區田
代田之法又以關隴多種罌粟出示通飭各屬嚴禁而陝西
榆延董福祥李雙良等降眾及飢民亦十七萬人公奏請發
部帑十萬兩從歸化綏遠購糧賑撫令綏德知州陳瑞芝與
劉軍將黃萬友擇老君殿瓦窑堡周家嶮荒地逐眾居之俾

耕墾自給而叛勇游匪逃竄綏延間者劉松山復會周紹濂
軍先後搜緝殲之於是公以北山迤北略定檄魏光燾劉端
冕各軍西進慶陽方整軍待發忽捕袁大魁黨五人言上年
官軍破雲巖鎮按平定關隴紀略平宜川雲巖鎮捻寇爲七年六月事公時剿捻在直隸也大魁
遁保安老巖窰憑險結寨常覘官軍進止出剽掠迺令爲前
導四月丙午軍進老巖窰巖臨洛水壁立千仞窰孤懸其中
左右立木爲柵柵外皆深塹支小橋出入窰前石磴紆迴瀕
洛建水樓爲外郭賊從樓上放火槍擊傷外人仰攻連日不
能下迺積薪樓下若爲火攻而潛從巖頂鑿石立柱引繩縋
壯士而下寇狂噪官軍短兵竝入誅袁大魁餘黨悉墜巖壑

亦無一脫者遂刻平其窟同時周瑞松破延安野猪窪匪屯其假息宜川延長者郭寶昌軍復次第破平之陝西境內悉清於時陝回竄走者散處靈州固原境黑城子及預望同心各堡而甘肅河狄回方敗甘軍南窺秦州斷蘭州餉道北路回擾平羅靈州中衛東竄出關外及阿拉善親王旂境進圍定遠城將軍金順率所部出邊

詔張曜宋慶軍繼進爲金順援應公方建議分兵三道度隴以甘南急檄李耀南吳士邁軍先由汧隴分出清水寶雞以指秦州五月乙酉河州回自成縣陷兩當分竄清水李輝武自寶雞進兩當殺千餘人回走徽縣已又敗清水回唐藏丁酉吳

士邁軍至清水聞回已竄秦安隴城急引軍進康平堡大破

之

批曠是年批吳中書大獲全勝稟云另稟并悉烈士苦心

早已議之惟慮神鋒早露不能盡其磅礴鬱積之奇故以

當年慰勉王壯武之語時相啟告今幸素志漸伸鄙懷亦可

稍慰然銛鋒以屢割而鉅源泉以屢汲而渾戒慎之心未可

一刻忘也治兵莫先於養氣養氣者蘭州運道始通是月庚寅公

氣在心存勿失一語乞常念之

自邠州長武進涇州北路檄劉松山全軍由西北進指定邊

花馬池以截甯靈之賊中路則魏光燾進屯安化慶陽劉端

冕分屯合水張福濟進甯州以西丁賢發進正甯周蘭亭駐

蕭金鎮皆遙營漸進就地屯墾而檄雷正綰黃鼎兩軍分由

涇州進平涼固原以勦北路散回與南路李耀南吳士邁秦

州各軍相應馬德順簡敬臨馬步軍駐靈臺爲南北策應

按

是年奏疏未刻彙有簡公以軍行益遠各省協餉逾時不至桂林請更名簡敬臨片

上奏曰臣軍餉事短絀蒙

天恩諭各省除每年原協臣軍餉銀三百三十萬兩署督臣穆圖善軍餉銀一百二十萬兩署撫臣劉典軍餉銀六十萬兩又添撥釐金三百萬兩總計八百一十萬兩各省如果遵

旨分撥起解臣自可一意馳驅迺函牘頻催并經西征糧臺翰林院學士袁保恆再三商懇自正月起截至四月底止計各省應解銀二百三十萬兩除穆圖善提解不計外其解到西征糧臺及起解在途者止七十餘萬兩臣與劉典楚軍積欠已多而自董志原平後令各營前進就近墾荒布種招輯流亡

所需經費不得不於正餉內通融挹注五月節前各軍僅求一月足餉迄不可得秦隴用兵籌糧難於籌餉籌轉運又難於籌糧古今不易之局而采糧轉運兩者尤非實餉到手無從籌措雖有良將不能點鐵而成金雖有神兵不能煮沙以當粥追軍士因飢致潰伍籍空存搜括民糧以爲食而民亡強募游手以充兵而兵廢卒致戰不能戰守不能守楊岳斌之急赴隴西趣戰而潰穆圖善之急保蘭垣竭蹶而危足爲前鑒臣奉

命出師豈敢逗遛不進然不預將後路稍爲布置餉道概予疏通而貿然前行再蹈覆轍其必貽

朝廷異日之憂也決矣。臣才智技能與閱事之久無以加於楊岳斌穆圖善而責任之重時局之艱無以異。且楊岳斌穆圖善專顧隴疆臣則主固秦以規隴楊岳斌穆圖善專顧隴餉臣則司分解而統收事勢固有不同也甘肅欠餉之勇以百數十營復又增營以耗餉臣則一接受督篆兵餉兼籌豈可置之不理如以空言塞責違

旨之罪將無所逃欲得實餉支銷又將安出此後師行愈遠得餉愈艱應懇

天恩敕下各督撫臣於協撥陝甘各款按月如數解到西征糧臺毋有短缺俾得預爲布置速赴戎機大局幸甚當是時甘肅

回土寇蔓延而尤著者西則馬尕三據西甯南則馬占鼐據河州北則馬化澁據甯夏靈州西甯靈州回皆用受撫爲名實已陰據其地而馬化澁所居金積堡當秦漢兩渠間扼黃河之要地形絕險貿易通西北各省及蒙古諸部擅有鹽茶馬之利馬化澁始以新教煽惑回民西甯河狄口外之回皆崇奉之遂潛圖雄長諸回部環金積堡堡寨五百有奇屯聚黨眾占取漢民產業婦女甯靈數百里間竝被其害董志原回久與通市馬化澁助使入擾而收其所掠財物又陰嗾所部出掠蒙古藩部穆圖善署總督馬化澁陽輸銀米歸誠穆圖善遂任以招撫之事迺益修築堡寨購馬造軍械與陝回

相首尾陝回敗則資以糧械戰馬往往爲公軍所捕覺而穆圖善始終信之數爲奏請至賞加提督銜及董志原平陝回各酋投竄靈州馬化澂遂陰招回勇而上書代陝回乞撫以窺公公既久察其奸度用兵自東而西必先平金積堡會得馬化澂書因示以勦撫本無成見特恐以求撫爲言者非其真心以發覺其謀於是穆圖善疑公有進剿之意復奏遣河州總兵胡昌會率同馬化澂安撫回眾

上如所請公迺疏言甘肅回民與陝回久相勾結卽業經就撫之靈州金積堡回目馬朝清卽馬化澂清水縣張家川回目李德昌或以馬械糧食顯與市易嗾其擾陝或以官軍聲勢浩

大勸其就撫相時而動皆以回教一家隱相親埒外雖恭順
無異王民內則暗肆披猖仍滋他族至如西甯之馬尕三藉
稱受撫挾持官吏與滇回之包藏禍心如出一轍尤勿論也
回之黨堅交固如此陰謀祕計如此若概加剿辦不特誅不
勝誅亦慮未變種人反側不安致妨大局若廣示包荒隨宜
招納則賊心未死轉瞬兵撤匪起實在意中甘肅撫局卽前
車之鑒也陝回敗竄甘肅後散布黑城子預望各回堡地與
金積堡相近馬化澂上稟代陝回求撫臣以分別剿撫之諭
示之生歟禍福聽其自擇蓋欲申明

神武不殺之德與怙惡必誅之威以期久遠也劉松山一軍臣飭

其先辦三月軍糧節節遞運然後前進到花馬池小作停頓
察看馬化澂撫局虛實及陝回離合蹤迹再定進止而密貽
劉松山書曰馬化澂名雖受撫而恃其富豪恃其地險陰與
陝甘各回相通以大局言之金積堡爲陝甘必討之賊失今
不圖後將噬臍無及從前雷曹兩提督攻金積堡因糧運不
繼後路被其截斷遂至一敗不振故欲攻金積堡非甯夏固
原均有勁軍不可而從東路進兵非熟審路徑屯積糧食層
層漸進不可麾下自綏德鼓行而西名爲剿花定之賊而實
則注意於金積堡竅逼近後察其順逆慎密圖之此關一開
則威震全隴迺收全功也七月張曜軍解定遠城圍宋慶亦

破鄂爾多斯各旂寇與金順會師磴口寇回擾甯夏平羅靈
州中衛壬午劉松山由清澗進軍鎮靖堡鹽茶廳土寇張貴
糾眾擾靜甯州莊浪檄黃鼎簡敬臨遄軍往剿先是公奏抵
涇州受總督印及是穆圖善以南路河狄回梗蘭州餉道爲
慮復取

朝旨趣公遄屯秦州公奏曰竊兵事有一定之規模有自然之次
第其先後緩急之節則必審賊勢軍情應之臣自進駐涇州
以來熟察甘肅全局北自花馬池而南少西爲靈州迤南少
東爲環縣又東南爲慶陽爲甯州正甯折而西南爲涇州爲
靈臺迤而西包陝西汧陽隴州北境踰山而西爲清水又西

爲秦州。清水之南爲兩當與徽縣成縣。東連陝境。南界蜀境。而甘肅東路自北而南之路始盡。以地理家飛鳥之數計之。不過一千三百餘里。以人行之數計之。則幾二千餘里。此甘肅自北而南之地勢也。由花馬池而西少北爲甯夏。又北爲平羅。由甯夏而西南爲中衛。又西爲古浪。古浪西北爲涼州。涼州北爲鎮番。西北爲永昌山丹。又西北爲甘州。高臺肅州。迤西而南則嘉峪關矣。此爲甘肅之北路。由慶陽而西爲鎮原。爲固原州。由涇州而西爲崇信。西北爲平涼府。又西爲隆德。爲靜甯州。又西爲會甯。爲安定。又西北達蘭州。蘭州之西北爲碾伯縣。爲西甯府。此爲甘肅之中路。由秦州而西爲伏

羌甯遠西北爲鞏昌府。又西北爲渭源。又西北爲狄道州。二百三十里達蘭州。秦州南爲徽成。東爲清水。東南爲兩當。西南爲西和禮縣。又南爲階州。鞏昌之西南爲岷州洮州及各土司地。此爲甘肅之南路。以見在賊勢言之。陝甘逆回萃於甯夏。所屬平羅靈州中衛一帶。其東竄纏金之賊。經張曜擊之沙金託海磴口。速解阿拉善定遠重圍。窮追至廣宗寺。復進賀蘭山。距甯夏不遠。宋慶又擊退鄂爾多斯及五勝扎薩等族之賊。據張曜報金順等各營已行近磴口。似邊外漸可肅清。劉松山全軍七月十二日已由清澗馳抵鎮靖堡。將糧運後路。節節布置。攜十二日之糧向花馬池前進。計此時已

抵花馬池。進剿寧靈之賊。北路兵力已厚。似邊內亦漸可肅。清南路秦州一帶。河州竄回自李輝武吳士邁兩軍擊敗後。六月又經甘軍梅開泰擊之伏羌。餘賊全遁歸巢。蘭州運道漸已疏通。河州近無大股出竄。穆圖善所派傅先宗等之二十四營。臣飭其分駐徽縣。以護完善之區。通餉運之道。俾吳士邁李耀南湯聘珍得隨時往來雕剿。以速戎機。似南路亦漸有肅清之望。其中路平涼府屬同原以北。陝回之騎零小戶多有赴營求撫者。臣飭各地方官指荒地絕畝。隨時安插。馬朝清續稟陝回有急於就撫者。有頑梗如故者。臣仍以分別剿撫之意示之。一面調道員魏光燾進駐慶陽。提督劉端

冕進台水防環縣竄出之賊。總兵張福齊進駐董志原之蕭金鎮。分駐屯子鎮西峯鎮。提督丁賢發由正甯進駐鎮原之驛馬關。截甯靈橫溢之賊。一面調陝西提督雷正綰由平涼進駐固原之古城川。提督周蘭亭由蕭金鎮進駐瓦亭。以扼南北之衝。惟中路平涼一府古稱雄鎮。自回逆肇衅。府城三次失陷。守令寄居村堡。力不能制土匪。且藉土匪自固。假以義旅之名。有鹽茶廳民張貴糾黨竊踞靜甯莊浪轄境。威戎堡水洛城。攻破民堡五十餘處。其黨侯得應亦攻破會甯秦安各民堡。聚眾至二十八營。與鎮原匪首孫百萬遙相勾結。爲平涼秦州一大患。臣前以驛馬關賊騎突至。檄黃鼎勦之。

過鎮原出不意擒孫百萬知縣廖溥明亦獲其弟孫百智臣
訊明斬決傳首犯事地方張貴聞知謀變益急其地居甘肅
南北之中甯靈之回與河狄之回往來勾結不由靜莊卽出
秦安將欲南北分馳掃除餘孽而土匪從中作梗餉道堪虞
若待駐軍防剿徒分兵力臣見調黃鼎率所部由崆峒化平
川徑擣莊浪所轄威戎堡賊巢調臣營務處前衢州鎮總兵
簡敬臨由靈臺出崇信以擣水洛城賊巢調駐秦州之員外
郎銜中書吳士邁道員李耀南湯聘珍等撥所部進秦安清
水會剿防賊南竄并搜剿秦安神峪河只股回逆如能迅速
蕲事則蘭州東西一律肅清省垣僅防河州之賊無須重兵

黃鼎仍回軍平涼進固原會同雷正綰進剿甯靈一帶回逆秦州之軍進剿河狄逆回而甘肅大局可期復振此微臣度隴規畫調度由東而西之大略也穆圖善前催臣進涇州接篆奉有

諭旨昨復欽奉

諭旨敕臣進紮秦州接篆比准穆圖善函咨又已具摺請

旨竊維臣由關度隴必由中路本一定之局以形勢言之北可聯絡甯靈慶固南可聯絡鞏秦東可屏蔽秦川西可直達皋蘭也以兵事言之北路劉松山定邊花馬池之軍距涇州雖僅數百里然兵燹之後郵傳不通文報從延安繞遞已非兼旬

不能達。臣接劉松山函牘。又須酌量調度。行知北路中路諸軍展轉迂回。已虞貽誤。若再遙駐秦州。則山谷間往返更多。千有餘里。尤覺聲息難通。況當勦撫兼施之際。隨宜因應。事變未可預知。臣駐軍適中之地。尙可就近料量。相機應之。若遙駐秦州。偏於南路。不但北路阻隔。卽中路亦運掉不靈。似於大局所關非小。且隴中軍事之誤。由於置平慶涇一道不顧。專就秦安一綫餉道。爲苟安之計。致匪回縱橫。生民荼毒。如此。夫豈不曰餉絀時艱。宜緩匪而急回也。又豈不曰宜先固根本。通運道。暫支危局也。而其效已可觀。臣若舍涇州而進秦州。局勢何以異此。人之議臣者。必且謂知有穆圖善。而

不知有

國事知有蘭州而不知有陝甘。臣雖百喙何能辭咎。此臣所爲反覆籌維。罔知攸措者也。且以地里遠近言之。由涇州至蘭州一千零二十里。由涇州繞秦州至蘭州一千一百六十里。本無庸舍近而道遠。而以賊勢言之。秦州無賊。靜甯莊浪有賊。臣未可避勞而就逸。如果北路事機順利。臣當由涇州大道進平涼。以赴蘭州。縱或蘭州有急。臣檄南路秦州各營爲迎剿之師。檄中路平涼各營爲橫擊之師。似亦易有把握。疏入。

上覽之。劉松山留黃萬友四營護運道。丙申整軍進花馬池。遇韋

州堡甘回率騎掠邊外南歸遣章合才劉錦棠兩軍破走之
八月庚子進磁窰偵陝回悉竄靈州境與甘回雜處辛丑行
三十里陝回拒甜水河官軍整隊逐之悉退走郭家橋距靈
州四十里官軍迺就城南止營其夜馬化澹黨居城中者詣
營言陝回占踞甘回莊宅甘回畏其悍不敢校劉松山迺遣
諭馬化澹傳示各堡寨大兵誅陝回有罪者已撫甘回各安
居無驚動次日郭家橋回擁大眾出拒官軍分道縱擊立夷
賊莊二十餘進至下橋橋跨秦漢人馬相擠溺斃尤眾窮追
抵吳忠堡迺回屯下橋扼永甯洞永甯洞者秦漢兩渠會流
入河水口也始馬化澹恃其地險謂官軍必不能深入陰賊

陝回拒戰而自別白以覘官軍彊弱及是頗震懼復上書公
代陝回乞撫而不言其兵敗冀公許所請以緩師而其日官
軍進戰甘回輒傍寨擊傷官軍劉松山復張示申諭免勦甘
回連日出堡索戰如故至丙午大眾直撲下橋屯劉松山遁
出兵擊之於時馬化澂已決秦渠水阻金積堡自固嗾靈州
甘回據城奪官軍餉銀復出精兵助陝回已敗者拒吳忠堡
反狀大露劉松山遁馳書白公自是以至戊辰連二十餘日
馬化澂召甯安四百戶黑城子半角城陝回絡繹而至軍屯
前後被攻劉松山日與接戰先後斃寇至萬餘人而西甯馬
尙三遁騎援馬化澂者亦皆挫敗遁還其時黃鼎簡敬臨已

連破威戎堡水洛城土寇公檄簡敬臨迓軍靜甯黃鼎軍由
瓦亭平涼會師北進馬化澹適畱甘回李正榮陝回白彥虎
等自預望城黑城子竄固原州以拒北行之師雷正綰時軍
古城川會周蘭亭軍迎擊半角城李旺堡回來益眾適黃鼎
簡敬臨自中路馳至合師大破之固原回悉遁黑城子公陳
前後戰事曰臣維馬化澹所恃以抗官軍者有二金積堡地
勢居秦漢二渠之間黃流分醜舊稱沃壤足以阻水自固而
困官軍一也馬化澹本新教回民與陝甘老教回民宗旨不
同及與漢民尋仇則彼此通同一氣而甘回究不如陝回之
彊馬化澹尤思藉以自衛始因陝回竄城爲乞撫市德於陝

回繼因陝回反覆又思別白以免官軍之黥其詭謀蓋謂陝回勝固可藉以爲重陝回敗亦有詞以自解究之陽順陰逆其心則路人所共知二也劉松山自花馬池進靈州於甘回已撫者本預示區別馬化澁喊甘回陝回抗拒時初不料官軍鋒不可犯妄思一逞以自雄迨八月初三日郭家橋大敗後初四日又遞稟代陝回求撫爲緩兵之謀而於劉松山兵至下橋距金積堡三十里則一字不露蓋欲掣臣與穆圖善準撫之批以挾制劉松山耳臣於馬化澁前稟批北路應由劉松山劉錦棠察看南路應由雷正綰黃鼎察看以此幸劉松山燭其奸謀一意進剿未及一月疊將甘回陝回痛予懲

創實殺賊一萬數千之多臣飭雷正綰黃鼎簡敬臨各軍亦於陝回犯固原時迅獲大捷奸謀更阻馬化澹旋又於九月初三日具稟求撫而函中增八月初六日一稟則頗以劉松山濫殺激變爲言猶思藉詞聳聽情形殊爲可惡臣又批飭之仍擬察其誠僞以定剿撫貳則討之服則舍之務在攻心以規久遠疏未入綏遠城將軍定安聞靈州城陷已上急奏言劉松山輕進濫殺激變

朝議大疑之

諭曰劉松山前在綏德曾有譁潰之事甯夏甘回投誠已久此次輕進激變賊眾兵單儻無食可就復蹈故轍則北路大局何堪設

想著左宗棠將起衅情形查明具奏不得稍涉回護其馬化澂陽爲歸順陰縱黨與滋擾變亂情形究因如何起衅著穆圖善查明據實具奏已穆圖善奏馬朝清實已撫良回劉松山激成事端恐甘省兵禍無已時卽將來左宗棠剿而後撫亦未必能堅回民之信奴才不敢知而不言聞而不顧已飭胡昌會督同馬朝清仍行妥爲開導令回民毋啟猜疑

上迭下所奏於公九月辛未馬化澂復遣人詣劉松山仍以代陝回乞撫爲詞劉松山令悉繳馬械迺許其請數日獻朽械竄馬劉松山督之急卽又詭言必官軍退橫城迺悉以獻而寇中日夜修堡濬壕縱游騎四出伺官軍動靜至辛巳劉松山

以兵徇余家湖金積吳忠兩堡回併出分軍迎擊敗之連下
敬家莊兩堡已寇復築壩吳忠堡南決秦渠水東流灌官軍
而伏騎數千於葭劉松山令軍各攜鋤鍤攻壩西壘若爲弗
知者竅寇悉過水漫溝迺決溝縱擊淹歾無數甲申遂囊土
填壕進破其堅寨五其王家高樓六寨以秦渠水決各寨爲
河西運道所必經丙戌劉松山乘夜襲破王家高樓寨復北
行八里至張家灘五寨相距數里分軍猛攻寇各不相顧悉
踏平之而留軍以守當馬化澂詣劉軍乞撫時密遣其黨馬
萬春督陝回楊文治禹得彥等復犯固原境之三營雷正綰
簡敬臨周蘭亭各軍方破寇黑城子丙子合軍迎擊於頭營

回大奔敗追至何家溝斬楊文治次日乘勝攻破李旺堡於是預望城半角城各甘回震懼乞降而陝回各酋潛約所部由鹽茶廳西竄長流水打拉城圖出會甯安定與河州回合甲申黃鼎馬德順率馬隊越鹽茶廳追至西安堡賊列帳平川延袤數十里官軍馳入大破之追過黃家園回眾壞散馬德順率輕騎前進爲伏兵所乘被創死丙戌黃鼎兼領所部疾趨打拉城其自甯安竄出者已先入保城軍士譟呼乘之殺傷甚眾回酋陳林馬正和余彥祿折回新堡子黃鼎引兵還擊而崔偉馬生彥白彥虎等遂益西趨會甯於是公檄雷正綰簡敬臨周蘭亭由半角城進長流水而遣黃鼎部將徐

占彪會楊世俊馬隊趨會甯以要西竄寇調張福齊逐駐黑
城子留陝軍周紹濂進屯固原癸巳雷正綰引軍出長流水
回益駭走追敗之馬家河灣陳林等遂還竄金積堡其日徐
占彪軍進會甯適土寇張貴率餘黨掠會甯北川出不意擊
降之偵崔偉等已竄過馬家堡星夜躡追至狄道十八盤黃
鼎軍亦至偵回已入河州迺還於時河州回間出游騎掠渭
源伏羌西和禮縣南路軍湯聘珍李耀南督傅先宗等迭敗
之迺遣道員曾傳理赴固原安撫各堡降回令黃鼎分所部
屯安定會甯靜甯以固省防雷正綰周蘭亭合師北進簡敬
臨張福齊分進半角城章州堡護運道自靈州被陷

詔數詢起衅情形。公以州城未復。未卽陳奏。及是劉松山軍屢捷。上猶以前次激變爲疑。公迺奏曰。馬化澂之陰賊險狠。天下共知。自就撫後。築寨修堡。購馬造械。仍與陝回互相首尾。陝回敗則資以馬械。陝回窮則助以軍糧。從前屢見章奏。自靈甯西達西甯。南通河狄。各回民無不仰其鼻息。穆圖善曾令其招撫西甯河狄。回迄不之應。且常嗾所部掠蒙古藩部。定安所訊據。活賊白天才之供。劉松山自花馬池南下時。曾擊敗飽掠回巢。韋州蘇光棍之黨。事皆在八月以前。是時官軍未抵下橋也。其變果誰激之言者。所稱濫殺激變。自是指八月初三日郭家橋大捷而言。馬化澂八月初四日所上臣稟。於劉

松山軍抵何處。且一字不題。豈果有激變之事。而反爲諱之乎。白彥虎楊文治諸逆之突犯固原州。實馬化澂賊其黨馬萬春率之以來。豈亦由固原各軍激之而然乎。甘肅漢回雜處。昔本漢多於回。今則回多於漢。甯靈一帶。周數百里。漢民幾無遺類。其產業婦女。均歸金積堡。老弱死亡。壯丁爲其傭工。細雇漢民之痛心疾首。抑何怪其然。臣接靈州紳民之稟。聳惕不安。頗慮失此不圖。張駿元昊之患。必見諸異日。臣此時扶同徇飾。欺己以負

皇上。異日蒙

旨詰責。歿有餘辜。至劉松山爲人忠勇。而明方略。當時諸將實罕

其比。卽如此次諸大捷。正奇互用。他人得其一。已爲奇功。而所陳戰狀。語語切實。絕少矜張。亦可概見。臣與曾國藩議論時。有不合。至於拔識劉松山於凡眾中。信任最專。其謀

國之忠。知人之明。非臣所及。上年曾舉以入

告。臣於劉松山雖有心愛護。思爲

國家保此將才。然事關大局。如劉松山實有濫殺激變之事。咎有攸歸。臣再爲庇護。自蹈欺罔之咎。臣雖至愚極陋。不敢出此。此區區微忱。所求諒於

君父。而不敢必者也。自來辦賊之法。剿撫兼施。然回性大羊。知畏威而不懷德。辦理次第。與他賊正有不同。辦他賊先剿後撫。

方文襄公年譜卷五
辦回則必以撫爲先。蓋回之所藉爲亂端者。漢與回有異視也。非宣布

朝廷德意。分良匪不分。漢回則賊有詞以脅其黨眾。將剿不勝。剿然若壹於主撫。賊必以撫愚我。陰集其黨眾。蠶食漢民。又將撫不可撫。竊恐漸漬既久。勢不至如雲南撫回爲回所制不止。臣前疏所言攻心爲上。者竊以爲大局雖終歸於撫。然非俟其畏剿之極。誠心乞撫。則固未可漫然允之。見仍飭各軍前追。一切剿撫機宜。必俟劉松山察酌定局。而後會同穆圖善具奏。斷不敢草率從事。致貽陝甘異日之憂。亦不敢鹵莽相將致傷。

皇上如天之德劉松山既克高樓各寨馬化澂復遣漢民饋米具
狀永無反覆而不復言繳馬械劉松山收其米計值與之而
不許所請甯鄉隆氏甯靈消化食記云化龍遣人自金積獻
芻糧數十車豆麥稱是時軍糧實匱忠壯令聚沙
土爲囤覆少米其上俾其人周視告曰糧我所自存
不煩化龍然既來無載還勞人力理予之銀如時值辛卯分
兵五路布疊陳銜枚進而各綴支兵於後以拒別堡援賊連
克金積東北馬家等寨殺千七百人獲馬化澂所給馬重三
拒官軍偽札按奏稿卷三十三克復靈州摺云劉松山九月
二十三日破馬家寨搜出馬化澂九月十三日
給偽參領馬重三吳天德楊長春糾黨抗拒偽札一封偽銜
統理甯郡兩河等處地方軍機事務大總統戎馬鈴以偽印其
狂悖之狀陰狡
之謀業經敗露初靈州官民久制於馬化澂及劉松山軍進
下橋扼永甯洞口金積堡地險頓失馬化澂遁喉其黨叛據

州城冀官軍返顧以收兩渠之險劉松山日夜攻取各堡不爲動及是黃萬友以郭寶昌軍至綏德率屯花定四營濟師道橫城靈州回遠出遮擊丁酉劉松山潛師夜趨靈州城外卡壘林立方進攻忽東來回騎千餘助守官軍分道猛攻寇不支退入城官軍急乘之回開東北門遁遂克靈州次日劉松山復攻下城東南四寨令黃萬友駐城撫輯而自還下橋屯當靈州回竄出時馬化澂復遣人詭言靈州回避陝回殺掠出城應由胡昌會擇地安插意以飾其陷城之迹劉松山示以克馬家寨所獲偽札因辭讓之其意迺沮於是公具以狀聞

上諭曰回目馬化澁既給與馬重三偽札是其狂悖之情業已敗

露而求總兵胡昌會保其永不反覆并代陝回甘言求撫前後兩

歧殊難憑信著左宗棠嚴飭劉松山乘此聲威迅圖掃蕩不得輕

率收撫轉遂奸謀書牘卷十一與夏小濤書云西事大類養癰失

引爲己任自燕齊返旆先清三秦旋直搗金積堡巢覘其吭而監其腦其時眾議繁興指爲激變其實馬化澁之心路人

皆知亦何待激也嗣搜獲賊堡偽札是月金順張曜兩軍解甯

夏城圍會師攻附城各堡下橋東十里許里仁趙家等八寨

環處雄峙參錯十月庚子劉松山自靈州還卽夕分道攻克

斬馘尤眾而自秦渠南板橋迤西蔡家橋以達金積堡村堡

鱗次陝回聚處其中以里仁各寨破頗震懾日議投誠久不

決劉松山擬痛勦以服其心甲辰令軍分由板橋蔡家橋進而伏馬隊其旁已步軍涉渠奮擊寇分東西潰走馬隊馳出截其歸路各堡回見之爭開壁西遁迫波浪湖官軍火器環擊寇人馬填藉湖水爲赤其日破莊寨三十餘追師直逼金積堡劉松山移屯劉家寨距金積堡十四里是時雷正綰周蘭亭軍進鳴沙洲馬化澂先鋒袁希孟據張恩堡出不意擊降之戊申至強家沙窩簡敬臨張福齋軍亦自韋州堡至合軍進分屯秦渠內外公馳檄悉聽劉松山進止而固原以東達鎮遠環縣山谷間游匪猶盛公移周紹濂軍分屯黑城子李旺各堡桂錫楨提四百戶丁賢發自鎮原出固原魏光燾

劉端冕分由慶陽合水進以護中路運道於是馬化澂復因胡昌會呈陝回馬械乞撫劉松山限三日畢繳自後十數日日有呈入而陝回向背不一其時吳忠堡各莊回皆已徙避迺下令願就撫者具籍逐居吳忠堡是月竄狄道回崔偉禹得彥等揚言回援金積堡徐占彪自安定會李輝武軍敗之隴西同時固原東山匪明先行嘯聚土回海生春等擾環縣鎮原各境掠官軍糧運桂錫楨各軍擊破之十一月戊辰朔公自涇州進駐平涼

書牘卷十三癸酉復總理衙門書云嘗歎泰西開花礮子及大礮子之入中國

自明已然見在鳳翔府城樓向存開花礮子二百餘枚平涼府西城見有大洋礮上鑄萬應及總制胡等字餘剩然則利器之入中國三百餘年矣使當時有人留心及此何自甘至島族縱橫海上數十年扶此傲我索一解人不得也

肅回亂獨秦州僻遠號完善蘭州恃以通轉運悉調重兵數十營駐之率尤雜無紀律而范銘等所領各營皆河狄土著招納叛亡人數至萬餘公度隴首除捐糧之令議以次裁併會周開錫自閩運協餉至迺奏以總統秦州諸軍陝回馬正和已徙居吳忠堡爲陳林黨所撓復中變劉松山仍決計進剿會金運昌率郭寶昌所部自清澗至庚午分所部攻金積堡東北金軍出西北雷正綰各軍以隔湖渠檄由西南進復破村寨二十餘次日東西各堡回大出劉松山誘寇至近縱擊大破之雷正綰簡敬臨聞礮聲急引軍由西南入堡中寇出鈔簡敬臨持短兵力戰迺突圍出於是寇悉逐眾拒東西

面循波浪湖增築長牆以守丙子劉軍直擣波浪湖寇憑牆力拒松山揮步軍繞東出卡後寇大亂棄牆竄走遂進毀堡旁禮拜寺簡敬臨銳圖繞波浪渠合湘軍穿寇堡數重礮石雨集裹創而前飛礮中腦殛營官姚連陞譚正明十數人皆殉徐文秀收餘眾退戊寅劉松山馳赴簡軍屯分營遙駐漢伯堡寇驟出邀歸路力戰卻之寇迺復繞渠西修築礮牆庚辰劉松山列隊進攻提督李就山陷陳夙官軍乘之入易致中朱德開等皆被重傷遂踏毀其牆金積堡北各堡寨皆據險而堅每攻一堡各堡四出援應官軍傷亡尤眾至是劉松山攻毀略盡陝回併入東西各堡馬化澂乘夜出精兵更番

助戰故寇屢蹙仍張十二月劉松山日夜督軍進攻寇伺隙
出犯者官軍輒擊敗之陝回不復能堅踞各寨馬化澂令埒
金積長壕列帳以居而徙甘回入據各寨數出東南取糧於
胡家堡松山偵知之夜出兵數路邀擊拔埒堡趙馬兩寨其
掠糧自韋州堡歸者亦爲雷周各軍所截奪西甯回旣敗還
不復至河州馬占鰲始至甯夏大言以兵援金積旣懾劉軍
聲威馬化澂數速之不敢應馬化澂迺仍招崔偉白彥虎等
自狄道大舉東趨截北路運道攻雷正綰各軍至固原半角
城曰撫各同堡響應周紹濂力戰禦之王銘忠以兵護糧過
黑城子回眾突至相持一晝夜魏光燾丁賢發馳至寇解去

遂合周紹濂軍破平牛角城西南各堡崔偉等走鹽茶廳黃
鼎軍出靜甯遮擊大破之鴉兒灣迺由巉口竄還狄道徐占
彪楊世俊復扼安定紅土窰好麥川擊敗之先時郭寶昌以
病留綏德督三營護糧運已山西以冰合調赴河防馬化澂
遣甘回馬呼來出邊牆乘虛繞陷定邊湘皖軍運道中斷公
奏謝郭寶昌還救而飛書綏遠城將軍自包頭購糧濟軍食
是年京察異等湖南大水公捐養廉銀萬兩賑濟 作舉
主徐熙菴先生神道碑銘書牘卷十四甲戌答楊性農書云
師墓在涇陽城西三十里榆楸數
百大可十數圍亂後枝柯無傷類有神護迺令有司永禁樵
采苦爲例置墓田建丙舍立神道加封樹豐碑大家巍然涇
川庶足慰先
師之靈矣

同治九年庚午公五十九歲

正月檄黃鼎軍出固原馬化澂望崔禹等寇不至復使靖遠
回糾臨洮回騎數千繞東山來援庚午驟掠半角城丁賢發
追敗之石峽口黃鼎軍出固原寇已悉數北竄先是中路各
軍馳逐游匪日益西向公慮陝邊備虛奏調豫軍馬得昭自
潼關迤駐三原策應未至馬化澂復遣陝回馬正剛海萬新
甘回馬升明等先後由東南踰山竄環慶撓官軍後路魏光
燾劉端冕分道遮擊敗海萬新等眾馬正剛乘虛遽掠甯川
正甯竄陝西三水其時劉松山逼金積堡營壘而重兵扼永
甯洞口以故馬化澂終不得逞公以金積牆堅壕深又積峙

多非決渠灌堡不能破而渠首之要在龍王廟峽口密令劉松山飭雷軍據其險馬化澧大懼呼米拉溝回繞道赴援臨洮回騎至復賊由秦渠南石家莊入踞馬五馬八條馬七各寨冀以窺吳忠堡壘丙子劉松山督軍趨石家莊寇已傍寨築堅壘三分軍三道各指一壘一鼓克之餘眾投馬五寨方議逼寨築壘東南寇騎數千突至辛巳出軍先擊援寇寇敗走胡家堡遂分遣易致中朱德開趙彩明取馬八條馬七寨以馬五寨堅而大自督譚拔萃周明勝李占椿等攻之戰逾時破其外卡劉松山策馬寨前督攻益急忽寨中飛礮中左乳譚拔萃等奔視劉松山揮令猛攻毋顧我亂行列諸將憤

怒爭執火丸冒礮石梯登遂拔其寨擒回酋馬五其日劉松
山以傷重薨報至公大慟當是時雷正綰以爭峽口築壘爲
援寇所乘傷亡數百人周蘭亭張福齊糧盡退屯鳴沙洲寇
遂圍正綰營公檄黃鼎趨援軍未集戰牛頭山復相率敗退
固原馬化澂聞劉松山沒峽口軍又敗挫復遣馬正和馬萬
春率陝甘各回圍預望城而賊黨眾益攻官軍吳忠堡壘以
奔永甯洞水口甯夏金順張曜軍方攻王家驢未下馬化澂
益誘通昌通貴各堡回盡變而河狄米拉溝回復相繼狎至
其時馬正剛已由三水掠渭北東趨蒲富同朝北路回前竄
走定邊馬朝元復自金積堡出甯條梁至鄜甘擾及韓城郃

陽一時全局大震

上下嚴旨詰讓逐李公鴻章援黔軍入關督剿公遣劉端冕李輝

武分道入援陝西奏加劉松山兒子劉錦棠京卿銜接統其

軍提督黃萬友副之

雷周稟卷十一是年與劉毅齋書云前接

具續行知總統老湘全軍以定軍心援賊紛至周張引退雷又被圍局勢極壞尊處未赴峽口之援自是向東南打賊能將吳忠堡一帶已撫未叛者安撫已撫仍叛通賊者剿之亦是一策春永將泮轉瞬桃汛下橋永甯洞是否準備至爲懸繫愚見前敵各營漸漸收同吳忠堡而嚴扼下橋永甯洞無黃河邊以通運道賊既巢堅糧足難以速滅則逼禁亦屬無益不如先圖自固爲是擇吳忠堡地勢高處築營嚴扼永甯洞司其宜瀉則我能制賊賊不能困我又可藉通甯夏糧道以於局勢爲宜如實不能支不能不作退軍之計則須通盤籌畫分先後分去留不可一併行動靈州既克不可拋棄永甯洞是下游津要必宜扼紮甯夏爲重鎮又官軍運道所經必須力顧此數處均應留兵愚意金軍宜過河以助金張就

甯夏平糴之糧而通靈州下橋運道靈州宜派馬步七八營
下橋宜派撥一兩營其主退者宜先審各路有糧地方以爲
趨向綏德鎮靖瓦窑一帶相去千數百里途無可因之糧恐
難必達查由靈州至環縣由環縣抵慶陽一路由金積堡打
漢伯堡出惠安堡章州下馬關而至預望城共二百六十里
由預望城西北去半角城百三十里去王家團莊一百里皆
有官兵駐紮一徑可通平涼府或從預望城南下二百餘里
亦可由瓦亭抵平涼此亦一路慶陽平涼皆有糧食可取惟
須裹半月之糧可期必達此爲退軍出險之策兩者請與傑
軒兄分任之一去一留於局勢方穩總要將軍中公私所存
糧食通籌合計以定主見免致臨時時東道梗阻湘皖軍采
周章壽公忠觀仍暫停靈州爲安

糧河西胡家堡回數出絕轉道劉錦棠出軍迎護日有戰事
二月壬寅金積回圖決板橋隄灌官軍劉錦棠黃萬友乘其
至越渠橫出殺傷甚眾遂逼秦壩關板橋東園堡營壘迨金
運昌所部駐之其時冰解胡家堡回適從上游決山水溝淹

吳忠堡壘劉錦棠令環壘修堰注小渠合流入黃而金積回復於迤北築石壩逼馬連渠水下注官軍築長隄自黃渠南接金積里許而沿隄濬溝導水注永甯洞馬化澂計不得逞復遣馬有全助馬正和攻預望城公增遣徐占彪率二千人赴援先是寇由金積堡南下必取道預望城公旣克固原以北各堡令總兵蘇如松立旌善營以賈回馬柏森等領之分駐其地故馬化澂攻之尤急己亥周紹濂蘇如松由半角城敗馬正和阿布條寇走李旺堡黑城子乙巳徐占彪軍抵預望城馬有全擁眾適至潛師夜起殲其眾其日屯將李良穆要馬正和黑城子擊斃之殘眾由下馬關遁歸者己未徐占

彪復追破之韋州堡馬化漣聞馬正和伏誅甚恐遁出眾東
會援寇萬餘併力攻吳忠堡壘戊午官軍與戰一日斬寇千
餘人甲子馬化漣潛營二壘靈州西南圖襲州城劉錦棠謀
知之二鼓與黃萬友循河東趨壓其壘猛攻之寇死者無數
悉破平其壘由是軍勢始振其時竄陝西回馬正剛已敗竄
入山劉端冕會陝軍連破之鄜甘捕斬殆盡旋扼楊家店破
定邊竄回馬朝元自澄白西走涇河李輝武扼武功扶風劉
軍復追敗之寇悉數還走甯州魏光燾防軍擊之走預望城
復爲徐占彪軍所敗其眾遂破壞同時南路河狄回由岷州
鞏昌犯秦州湯聘珍梅開泰出漳縣敗之寇遂由甯遠禮縣

越鹽關狂走西和成徽兩當周開錫遣兵扼秦州破之而崔
偉禹得彥等聞馬正剛竄陝西復句河州回出狄道敗安定
屯將楊世俊東走通渭秦安并攻清水三月南路軍畢集清
水寇遂入陝西隴州汧陽合出寶雞李輝武以軍少而敗庚
辰吳士邁星夜自汧陽出擊大破之截寇爲二禹得彥東趨
岐山崔偉折由隴州西竄吳士邁追敗禹得彥羅局鎮寇遂
越渭南走蒲城白水公遣張福齊軍入援自高陵躡之迺還
掠甘肅甯州奔固原徐占彪蘇如松合軍大破之禹得彥以
數百人西遁崔偉先由隴州竄秦安礙於南路軍走莊浪隆
德爲楊世俊所敗復奔還河狄於是周開錫議督諸軍乘勝

規狄道馬化澹以竄陝軍連敗益失望復率其子馬耀邦卑

詞求撫以春耕急乞退兵吳忠堡公許其耕作仍責令悉繳

馬械迺受撫書牘卷十一是年與楊石泉中丞書云西事大

毒日甚叛蹟彰彰尚以弟激變焚惑天聽劉壽卿一腔

忠義近世無兩與弟計議至熟卷甲疾趨監其腦而提其吭

不料大捷之後遂以捐軀失吾右臂傷何可言幸毅齋嗣事

雪涕臨戎連戰皆捷中路諸軍復將陝回元惡馬正和擊斃

而同時南路崔禹諸逆出陝回竄者又經疊次截勦僅數百

人漏逸而去馬化澹父子哀詞求撫弟未之許仍以武臨之

大約殲其渠惡宥其脅從事迺可定也西戎錯處中土千數

百年涵濡卵育種類繁滋肇鮮八年誅殛何可數計而馬化

澹以新教句煽其眾猶蠭蟻一隅其聲息呼吸數千里此關

一聞餘或不甚煩兵力弟一息尚存不敢不勉又與夏小

濤書云老賊計窮復又哀詞就撫仍未許之大約兩三月糧

盡援絕藏役可期漢回構釁既深見則必殺良回慮解散後

無策自全匪回則以此劫持其黨得以自固其人柔則狡詐

剛則桀驁知畏威不知懷德性與人殊若圖導引善機廣開

生路非需時日。竊其生路斷絕。逆志潛消。不可若草。草爲之
撫。不能久也。武鄉之於孟獲。獨以攻心爲上策。然必至南人
不復反。通與結局。所謂於是。馬化濇復修長壕。引馬連渠水
入湖。阻官軍進攻。劉錦棠督軍冒險平毀。寇伺間復修。自庚
辰至己丑。晝夜鈔擊。蕩平其壕。而渠水被決。橫溢平地。成川。
四月戊戌。官軍併力修濬。忽西北風厲。水驟漲激湍。洶湧衝
齧蔡家橋壘。長隄各營。迺排木椿囊土禦之。越兩日風止水
亦漸落。入黃甲辰。馬化濇遣眾由大壩三關截官軍。廣武中
衛糧運黃萬友潛師由葉升堡渡。搜斬其眾。同時金運昌遣
提督王鳳鳴通定邊花馬池。轉道會陝回陳林。自金積挾眾
數千出花定掠食。王鳳鳴敗之。磚井鎮陳林被傷遁。還戊午。

劉錦棠遣兵要靈州東南悉奪所掠牲畜其黨馬長元率餘眾由花馬池轉掠定邊甯條梁公檄劉端冕出鄜州破之五月河狄回以官軍進偪復出渭源紛擾鞏秦各境周開錫令傳先宗王得勝進鞏昌楊世俊田連考由秦州出伏羌迭要寇於甯遠禮縣敗之乘勝克渭源狄道兩城并破狄道城東牟佛諦堅堡公遂令各軍憑洮設守奏曰甘南各軍乘崔禹李米諸逆竄陝敗歸截剿疊勝連復渭源狄道兩城平諸卡寨機勢尙爲迅利以局勢論之宜長驅并進規復河州惟自秦州迤西而鞏昌而狄道四百餘里中間渭源屬境二百餘里彌望蒿萊人煙斷絕大軍前進後路須節節設防以護運

道防兵多則進剿之兵少。察看河州賊勢未可虛弦下之。非
峽北路甯靈肅清由蘭州出兵難期得手。論兵勢須防後路
通饟道。論賊情須斷句結取遠勢。未可重剿輕防。致有疏失
也。

上臚之甲申馬化澂遣老弱回民詣營乞板橋琴橋吳忠各廢堡
耕作而中路回王洪亦請修秦渠蔭田冀以奪永甯洞水口。
劉錦棠知其詐。佯許之而先爲三伏。永甯洞下橋乙酉王洪
等果糾胡家堡各回至伏起突擒王洪斬之。乘勝拔馬八條
馬七兩寨。其時胡家堡至海子墩洋麻湖大沙井新麥垂熟。
六月劉錦棠金運昌督軍分道收割回眾出爭乘間破海子

墩杜家寨而其間王紅連寨尤大丁未會金軍進攻先奪寨外禮拜寺支礮其上而分軍攻其西北寨中礮石如雨譚拔萃率壯士豎三梯而上墜而復登者數軍功張俊肉薄先登遂破其寨誅王紅連殺回眾千餘官軍傷亡亦數百人其時金積回取糧河西通昌通貴兩堡必繞道東南郭家寨在吳忠堡正南癸丑合軍攻克之丙辰復破其東北一寨於是公檄雷正綰黃鼎復整軍北規峽口而自固原進兵以馬家河灣爲要隘韋州堡爲間道其間已撫回且皆潛受馬化澂僞封爲其用公迺召馬家河灣回馬忠海至平涼計事而遣馮桂增率千五百人疾出圍其五堡悉捕誅兇黨并獲所掠官

軍軍裝衣幟及通逆書遂誅馬忠海定其地同時令丁賢發
軍徃爲自韋州堡進兵回曰蘇兆明先匿金積回數百人堡
中聞官軍至遽遣出遁丁賢發以百人徑入屯堡中蘇兆明
率其黨謁丁賢發遽收斬之而安撫其衆雷正綰黃鼎遂總
各軍北進公旣清中路陝回敗散受撫者先後已數千人迺
就平涼安置奏曰辦回之道與辦髮逆捻逆不同髮逆薙髮
捻逆拋棄馬械卽與平民無異故戰勝受撫給以免死牌票
資遣歸家措置得宜卽可相安無事其無家可歸及悍驚不
馴者或羈之營中鈐以軍令編管旣密久亦相忘回則不然
與漢民積仇旣深婚姻不同氣類各別彼此相見輒起殺機

又種族攸分狀貌亦異。雜一回民稠眾中。令土人識別。百不失一。回民中豈絕無知順逆。思拔來歸者。然久處賊巢。既苦頭目之侵陵。迫脅。甫離巢穴。又畏漢民之報復。尋仇。當殍生莫卜之時。靡不依違其間。以求苟免。此解散之難也。以陝回人數計之。從前無事時。散處各州縣。丁口奚啻數十萬。見計除西安城中土著兩三萬外。餘則盡族西行。陝西別無花門遺種。卽合金積河狄西甯涼州等處。見贖陝回計之。丁口亦不過數萬。其歿於兵戈疾疫饑餓者。蓋十之九。實回族千數百年未有之浩劫。區區遺種。旣無歸陝之望。就甘地安插。而甘民痛定思痛。又不免他族逼處之虞。此安插之難也。疊奉

諭旨不論漢回祇論良莠仁育義正之懷昭然若揭回民豈毫不
知感無如仇衅四結每苦無處求生莫知禍之所屆臣維解
散安撫實辦回不可少之著因於經理屯墾之餘劃出荒絕
地畝以處求撫之陝回見在平涼大塋溝等處收撫陝回老
弱婦女及丁壯約數千人均給以牲畜籽種課其耕作與賑
撫各屬災黎招輯屯墾一律辦理以廣

皇仁

書讀卷十一是年與李少荃伯相書云回之錯居中國自古
而然徙戎尙難何況議剿欲比花門種類而盡之無論勢有
不能亦理有不可入關之始卽奏分別剿撫蓋不得已也竭
誠力行已閱三載至今歲春夏乃見微效安插平涼者尙祇
數千惟獲訊金積狄河回目亦知平涼安撫之局實出至誠
陝西各回酋始無詞脅迫諸回馬化澁亦不能挾陝回以爲
重然如馬化澁父子則實無撫理而又不可深是月李公鴻
閉固拒以絕甘回求撫之心此誠難而又難也

章行至潼關以天津民教肇衅

召還

按書虜是年有復總理各國事務衙門書云秦西各國與中國構衅類皆挾持大吏以鈴束華民至拂輿情犯眾怒則亦有所不敢津郡事變之起由迷拐激成百姓羣起與之爲難雖受迷無據而幼孩百許童貞女屍適從何來王三雖未承招武蘭珍則生供具在不得謂無其人無其事也百姓之開起事出倉卒非官司授意致然豐領事且以洋槍擬崇大臣天津令從人已受傷矣其時欲爲彈壓亦烏從彈壓之愚見法使所稱四層如志在索賠了結固無不可通融若索民命抵償則不宜輕爲允許一則津郡民風彊悍操之過蹙必起事端萬一如該公使所言激成變亂中國有蕭牆之憂各國豈獨無池魚之慮且津民鬩然而起事出有因義憤所形非亂民可比正宜養其鋒銳修我戈矛隱示以凜然不可犯之形徐去其偏末可以倉卒不知誰何之人論抵致失人和彼如以必欲抵償爲言則倉卒莫得主名在我本爲有詞僅更濫及無辜怨毒益深即彼亦多不利各國以通商爲利仍以眾怒爲畏亦必自知設法轉圜無須別作計較也仍

詔公兼顧陝疆七月戊辰劉錦棠奪蔡橋水口拔其旁堡寨二遂

沿秦渠攻王洪寨未克而金積回據蔡橋西隄逼兩渠水下灌丙子會金運昌軍越隄築壘其上寇大出戰一日敗退戊寅壘成決水反灌寇軍寇復築隄以禦而傍馬連渠爲三壘以抗板橋軍甲申分道力攻克之自是金積與胡家王洪陽明各堡中隔而河西糧路亦斷於時雷正綰黃鼎已破張恩堡與徐文秀會師進牛頭山公增遣陳廣發馮南斌先由四百戶渡河扼峽口北岸戊子雷黃軍攻峽口壘金積援寇大至黃鼎軍牛頭山擊卻之峽口寇不支圖渡河西竄爲陳廣發軍所扼復還伏壘中各軍乘之入立奪其五壘殲積寇殆盡峽口旣得金積回日引眾來爭輒爲官軍所敗迺憑漢渠

扼古靈州以守甲午徐占彪夜襲古靈州城寇走丁家堡合軍進攻戰三日克之八月戊戌乘勝破漢渠旁堡寨二十餘遂逼洪樂堡而壘距金積堡西門十數里馬化澂使眾堅守老馬家丁家各寨復增壘石屹塔田家橋以護洪樂堡而西北倚秦壩關通馬家灘接濟當是時劉錦棠駐東南李花橋金運昌駐正北蔡家橋迭破橋西卡壘而礙於秦壩關與洪樂堡各軍不相應丙午會金運昌軍進攻秦壩關徐占彪亦出軍石屹塔分寇勢攻一日未能下馬化澂益於堡東增壘丁未迯軍攻破之遂逼東關修礮壘東關者堡東迤北廛市關外環堅壘築甬道屬之堡門回民所聚處者也辛亥堡中

回絡繹出援劉錦棠分軍禦之益趣築壘相持至夜深援寇
敗退迺逐破羈擊守寇大亂軍士乘勢奪門入焚廬舍三千
所關外卡壘二十餘悉平之劉錦棠遂逐軍東關雷黃軍時
亦迭破老馬家石屹塔各寨壘於是議分段鑿堊長圍以困
之是月黃萬友卒於軍於時天津教案平而法方兵敗於布
洛斯擄其主路易非斯公策法未卽亡當遣使布法居閒爲
解上書總理衙門言其事

按書牘卷十一是年有上總理衙門書云泰西各國雖尙兵爭然遇

有人爲之和解調停亦知敬慕縱各是其是兩不相喻然於
居閒者無件也布洛斯卽普魯社久爲法所侵陵銳思報復
精製後膛螺絲開花大礮法與英不能敵也法之敗聞由於
此嘗取布之義耳礮與法人新造飛輪礮玩之則義耳意匠
精緻極開花礮之能事非飛輪所可同語卽一物之微而法
布盛衰繫焉布商來中國者不似英之狡法之傲如能以息

事安人之說動之則伏既復而忿亦解宜可從也法恃其槍礮輪船橫行海上兵以不戢而自焚而國勢尙疆人心尙固其主路易非斯鑒擊破倫以黷武爲英吉利所放矯以寬厚國人戴之茲雖被擄失位法國不卽亡也我於此時姑樹德焉法如知感布亦安之雖英亦將頌義不暇何患之能爲數年以後聞局輪船日多駕駛日熟器械日精中國且得以鞭箠使之矣傳曰天子有道守在四夷又曰禮失而求諸野儒亦有合於此芻蕘之見伏希財察按是書又有云寄諭以江西漏洩機要致貽口實敕疆吏慎密固亟應遵行然旣已有所傳播彼又挾之爲論端似不必更有所隱方津事之殷也彼方虛詞惘惘電本國調兵船入津門我能無戒備申警乎彼如思逞疆吏自應防患未然豈能束手以待正詞斥之彼似無可藉口

九月乙丑黃鼎軍乘馬化澧乞撫入據洪樂堡湘皖軍方修築壕壘日夜與寇搏戰期中路各軍合長圍庚午至甲戌黃鼎雷正綰徐文秀悉下洪樂堡劄各寨遂合軍攻秦壩關丙子余彥祿率陝回千餘人自堡西潰圍出劉

錦棠急起截擊寇乘官軍方破秦壩關遽掠蜀軍後趨漢伯
堡竄河西別黨南竄預望城自秦壩關既下長圍迺合獨王
洪陽明棗園各寨及漢伯堡尙逼處壕外丁卯合軍攻漢伯
堡阻水不能進迺遙兵東北攻棗園三堡破之十月丙申復
大舉攻漢伯堡囊沙填壕進二鼓寇穴牆竄出官軍四面擊
之斃寇凡六千人其南竄之寇己亥至半角城屯軍周紹濂
再敗之魏光燾復擊之固原西山餘寇走會甯靜甯公檄李
耀南楊世俊出安定要之當是時中路進兵金積堡自平涼
至前敵各軍連屯三十餘營按程設局轉運軍裝軍火糧餉
寒衣棚帳各營更番迎護車馱駱駝日夜相屬於道而自平

涼逾固原以抵靈州九百餘里其閒崖壑重險土匪奸回及
竄出逸寇倏忽狎至勞險不可殫述

上以金積堡攻逾年未下

寄諭讓公曰陝甘回匪滋事以來朝廷大張撻伐命左宗棠爲欽
差大臣督兵勦賊每歲撥用餉銀不下八百餘萬兩該大臣於用
兵籌餉事宜有所陳奏立見施行畀任不爲不重迺抵甘以後雖
屢報勝仗總未痛埽賊氛致金積堡一隅之地日久未克逆首稽
誅軍務安有了期竭東南數省脂膏以供西征軍實似此年復一
年費此鉅帑豈能日久支持該大臣捫心自問其何以對朝廷公
具陳戰狀曰臣維金積堡城周九里有竒東自吳忠以至靈

州堡寨共四百五十餘所見僅存王洪楊明兩堡西自洪樂老馬家寨以至峽口張恩堡堡寨關卡共一百二十餘所見僅存大河中洲馬家灘四堡餘皆一律埽除劉錦棠一軍自金積東面紮至南面金運昌一軍紮北面距逆堡半里許或一里西北徐文秀正西黃鼎西南雷正綰延紮營壘距賊堡一二里或三里北與金運昌接南與劉錦棠接掘壕兩道一禦堡內竄出之賊一禦堡外來援之賊壕深不及一丈以其地瀕河爲積淤所成平地掘三尺則見水不能深也見於牆上壘土爲隄合高深共二丈餘壕闊三丈勻撥各營晝夜防守正隅分布鎖圍已成飛走絕迹賊中渠魁馬化澂聞被重

創賊勢衰蹙可想惟金積堡城高近四丈堡深厚約三丈堡中有堡呼爲王城其高厚亦如之中間牆壁縱橫渠水環複尺寸皆堅馬化澂從前詐降後一意築掘廣儲槍礮增險負固蓄謀已久地勢之難攻如此自乾隆四十九年馬明心蘇四十三以新教煽亂伏誅後根株未淨萌孽潛滋至馬化澂而復熾其教輕生好勝兇狡忍驚較回中老教爲尤甚此次馬化澂尙有乞撫之說其黨族則一心作賊并不求生堡寨將破時先刃其家屬或投諸水火迺解衣格鬪死而後已其堅悍如此賊中子藥尙多每攻一堡將目多有傷亡賊中乏糧者雖三分有一而馬化澂積年所儲猶支數月攻堅厯無

善策地道既以土薄水淺不能成功開花礮彈卽測準施放炸裂之後多爲牆壁隔闌勢難透遠臣所購西洋普魯社卽布洛斯之義耳礮軍中所稱後膛開花螺絲大礮者也力大有準近日攻克各堡多得其力賊膽之寒亦在乎此然堡城係泥土所築非磚石壘砌而成屋頂皆平而四角微低傅泥土極厚礮子落街上穿牆則開花後多所轟斃若墜屋頂而已開花則鐵片直下無力或隨勢溜落不能奏功以之橫攻堡牆則牆厚三丈礮子不能穿透在土中開裂亦不能澈底掀翻故攻堅羣推此器而用之不能曲盡其妙亦賊之堡屋有以限之此地道不能開炸礮不能破之情形也臣原擬攻

克峽口即可放秦渠以渰金積放漢渠以渰各堡迺峽口甫得而湘軍已破金積東關遂營駐之若圖開放渠水必令湘軍預爲遷避迺可無論兵事有進無退萬無令其遷避之理設令其遷避引水苟遲久無功臣將何詞以自解湘軍既進東關則峽口兩渠且宜閉塞來源以期安心攻勦而攻堅必損壯士見在各堡寨雖已掃除殆盡而各軍將士傷亡實已不少前奉

諭旨仰窺

聖意以用餉多而程功緩無以上對

朝廷臣比宣示諸統將冀各發天良俾得迅速奏功稍寬咎責而

察看近時每戰必捷而傷亡更多臣若再爲峻督恐或冒昧
圖功轉致債事合無仰懇

皇上天恩稍寬時日冀可從容就緒以慰

慈廑敢有擁兵觀望攻勦不力致失機宜者無論統領營官臣當
據實奏劾按軍法治罪如臣敢含糊徇飾顛倒是非并請

皇上明正臣罪以爲不忠者戒其時寇勢實已窮蹙漢伯堡旣克
獨逸東王洪楊明兩堡對峙扼靈州西南要道劉錦棠益激
厲士卒進攻癸卯合圍楊明堡仰攻一日一夜寇勢不支乙
巳縱火突圍出伏起擒逆酋楊洪開斬之方進攻王洪堡會
公偵崔偉禹得彥等糾眾將自鎮番繞草地來援檄各軍戒

備迺還師攻河洲馬家灘以防援寇是月河洲回渡洮河擾
靜甯合前金積竄回餘黨敗屯將蕭賞謙會公舊部將劉明
鐙楊芳桂自閩至令率所部出扼靜甯寇還掠通渭秦安圖
竄清水楊世俊大破之邵家堡追至鐵鑪坡寇遁入南山閏
月復出擾徽縣兩當趨隴州各軍合擊破散之劉錦棠圍馬
家灘督各軍喋血圍攻連三十餘日寇傷亡山積猶死守而
金積回以鎖圍合飢困尤甚迺悉驅陝回堡外公度其勢已
離遣降回劉秉信詣軍前招撫來投者先後數百名甲申馬
化澂以大軍久攻馬家灘謀乘虛犯東北壕牆突出官軍偵
知之先伏軍以待至夜半寇由堡根潛趨東北越壕攀堞而

上官軍槍礮迸發殲寇無數於是逼東門築崇臺安礮以瞰堡中寇益兇懼十一月壬寅陝回陳林等率老弱回民八千人跪壕外乞撫劉錦棠受之分置丁壯各營而處婦女壕外馬化澂適因陳林願輸糧賑壕外婦女求解馬家灘圍使受撫許之於是入收馬家灘馬械遺回存者千餘人令平堡寨居故處丙午王洪寨亦平堡寨以降馬化澂見撫局已定丁未隻身詣軍前請罪將士咸欲誅以雪憤劉錦棠馳使告公而令馬耀邦平毀堡牆繳馬械籍戶口待命於是余彥祿等自河西率眾千餘相繼來降陝回存者男婦共一萬一千有奇公令分起解赴平涼處之平涼華亭界化平川自是甯靈

無陝回種人前山西按察使陳湜時總公軍營務公遣馳詣金積堡以河西王家驢各堡未下畱馬化澂軍中密奏曰關隴安危樞括全在金積金積一克全局已在掌中見在首逆就擒勒其繳械平堡而鎖圍如故馬化澂稔惡三世謀逆已久蓄機甚深縱有後效不蔽前辜暫若從寬必滋後患臣早知爲

國家必討之賊而此時議暫緩其誅者王家驢堡非猛攻所可驟得金積旣克其勢已孤以馬化澂徇之宜可速下若先誅馬化澂回酋或懷疑畏必滯戎機王家驢一下通昌通貴無難料理至河州馬占鰲早有就撫之意西甯馬尕三自援金

積敗歸已略識兵威尙非所急約金積堡城平毀後先圖王家瞳王家瞳撫定後馬化澂父子兄弟親屬夥黨重者誅夷輕者遷徙迺收全功至馬化澂所以公爲戎首者以新教惑眾斂錢以貿易經營致富又據金積膏腴之地侵佔漢民產業富甲一方故蘊利生孽也臣見飭諸統將平毀堡城後凡馬化澂親屬財產勒令悉數充公以之頒賞將士賑撫地方庶天理得人心順而

國法亦伸又聞該逆於北省各口開設店鋪分布夥友領本營運藉以探聽衙門消息交結回民洋商尤爲可駭臣自燕齊反旆而西張曜自豫入晉各省回商皆馳報陝回金積堡此

其明徵臣擬竣諸務就緒後次第奏明辦理惟事機未可輕
露端倪局外不悉情形必且憑空揣摩徒滋議論此任事之
難也

上從所請

家書是年寄諸子書云金積堡鎖圍久合馬化澂隻身

甚深此時若稍鬆手將來仍是西北隱患且戎狄之患最難

收拾本朝都燕以九邊爲肩背尤不宜少留根莖重爲異

日之憂不比陝回由積弊私闖起事尙可網開一面也度隴

以來先注意於此雖同事之牽掣異己之阻撓朝廷之訓

飭皆所不敢屈幸如此了結寸心適安若論其事之難則趙

元昊始終爲宋患河套爲明患聖祖之征準部撫定蒙

古而眾建之一時名臣名將所綢繆其計畫亦無以踰此又

有云吾廷督陝甘有代爲憂者有快心者有料其必了此事

者有怪其遲久無功者吾概不介意天下事總要人幹國

家不可無陝甘陝甘不可無總督一介書生數年任兼圻豈

可避難十二月馬化澂遣人至王家疰招所遣何生洲等數

就易哉

百人歸金積就撫癸酉金順張曜軍克王家驢己丑通昌通
貴兩堡回亦詣黃鼎軍降崔偉等聞金積堡破自涼州引還
是月甘軍范銘部卒叛於岷州先是周開錫以范銘軍尤尤
雜前後調所部十營駐鞏昌以孤其勢奸黨尤芝政等遂劫
餘眾倡亂范銘不能制棄軍逃周開錫遣楊世俊張仲春往
討公具狀以

聞且奏曰臣維隴事之壞在從前餉事艱絀日募勇徵兵不能立
營制定餉章惟倖目前無事是非之不明威令之不行也久
矣故逆回而外土匪橫行潰軍迭起今欲轉弱爲彊去尤雜
而求精實開辦之始成效未著議論必多臣不敢因此而

所境惟當慎以圖之

是年二月周夫人卒於家

書牘是年與楊石泉

書云屏軀自嚴州患瘡後卽病腹瀉七年之疾至今未瘳春間復抱亡妻之戚忍哀割痛以就王事形未瘳而神已傷

計西事粗定亦將辭塵界而回歸大暮矣

公爲墓銘以寄

家書是年與威寬勛同書云爾母賢明淑慎常

履憂患終身不知安閒享受之樂此可哀也執筆爲墓銘不敢過實然心滋傷矣

按是年家書有云何三在家看門老實而晚景不佳爾母在閨時曾說過給與一名勇俱吾諾之

惟念勇之口糧不可給家丁是以久未給與予亦且忘之今

寄信若農勤撥養廉銀二百一兩六錢交爾給何三以了此項蓋四年勇費之數按周夫人至閨在同治五年茲因周夫

人歿始憶及之故給以四年勇費之數也

十月作西嶽廟碑